



საქართველოს მთავრობის გ ა ნ კ ა რ ბ უ ლ ე ბ ა

N 1238 2024 წლის 27 აგვისტო ქ. თბილისი

ლანჩხუთის მუნიციპალიტეტში, სახელმწიფო ტყის ტერიტორიაზე, სამონადირეო მეურნეობის მოწყობის მიზნით, სამონადირეო მეურნეობის სპეციალური ლიცენზიის გაცემისათვის სსიპ – გარემოს ეროვნული სააგენტოსთვის დამატებითი სალიცენზიო პირობების განსაზღვრაზე თანხმობის მიცემის თაობაზე

„ცხოველთა სამყაროს შესახებ“ საქართველოს კანონის მე-40 მუხლისა და „ტყით სარგებლობის ლიცენზიების გაცემის წესისა და პირობების შესახებ დებულების დამტკიცების თაობაზე“ საქართველოს მთავრობის 2005 წლის 11 აგვისტოს №132 დადგენილებით დამტკიცებული წესის მე-8 მუხლის 11¹ პუნქტის საფუძველზე, საქართველოს გარემოს დაცვისა და სოფლის მეურნეობის სამინისტროს (შემდგომში – სამინისტრო) სსიპ – გარემოს ეროვნულ სააგენტოს მიეცეს თანხმობა, გურიის რეგიონში, ლანჩხუთის მუნიციპალიტეტის ტერიტორიაზე, სსიპ – ეროვნული სატყეო სააგენტოს მართვას დაქვემდებარებულ სახელმწიფო ტყეში, კერძოდ, გურიის სატყეო სამსახურის ლანჩხუთის სატყეო უბნის ჯუმათის სატყეო კვარტალებში (კვარტალი №1; №2; №3 და №4) – 625 ჰა ფართობზე სამონადირეო მეურნეობის

მოწყობის მიზნით, სამონადირეო მეურნეობის სპეციალური ლიცენზიის გაცემისათვის (10 წლის ვადით) განსაზღვროს დამატებითი სალიცენზიო პირობები, კერძოდ, ლიცენზიის მფლობელი ვალდებულია:

ა) უზრუნველყოს სამონადირეო სავარგულით ადგილობრივ მცხოვრებთა მიერ პრიორიტეტული სარგებლობა, „ცხოველთა სამყაროს შესახებ“ საქართველოს კანონის მე-40 მუხლის შესაბამისად და, ამ მიზნით, სამონადირეო მეურნეობის მართვის გეგმაში ასახოს შესაბამისი ღონისძიებები;

ბ) სამონადირეო მეურნეობის მართვის გეგმის შემუშავება უზრუნველყოს ადგილობრივი მოსახლეობის (რომელიც დასახლებულია ან/და მის მიმდებარედ ეწევა სამეურნეო საქმიანობას და რომელზეც ზემოქმედებას მოახდენს ან შესაძლოა, მოახდინოს ლიცენზიით გათვალისწინებულმა საქმიანობამ) მონაწილეობით და კანონმდებლობით დადგენილ ვადებში წარუდგინოს სამინისტროს;

გ) სამონადირეო მეურნეობის მართვის გეგმის დამტკიცების წლიდან ყოველწლიურად, ლიცენზიის ვადის ამოწურვამდე, უზრუნველყოს კოლხური ხობხისა (*Phasianus colchicus*) და სამონადირეო მეურნეობის მართვის გეგმით განსაზღვრული სხვა სახეობების აღწარმოება, შემდგომ სამონადირეო მეურნეობის ტერიტორიაზე გაშვების მიზნით, გენეტიკურად სუფთა ხაზის მქონე ინდივიდების/მასალის გამოყენებით, რაც დადასტურებულ უნდა იქნეს სარწმუნო მეთოდის/წყაროს საშუალებით, რომელიც აისახება სამონადირეო მეურნეობის მართვის გეგმაში;

დ) განახორციელოს სამონადირეო მეურნეობის მართვის გეგმით გათვალისწინებული, შესაბამისი კვლევის შედეგად იდენტიფიცირებული სანადირო სახეობების, მათ შორის, უცხო ინვაზიური სახეობების (ასეთის არსებობის შემთხვევაში) გარემოდან ამოღება;

ე) ლიცენზიის გაცემიდან 1 თვის ვადაში, სალიცენზიო ფართობის დაცვის მიზნით, სათანადოდ დასაბუთებული საჭირო რეინჯერ-ეგერების

რაოდენობა შეათანხმოს სამინისტროსთან და მათი მეშვეობით განახორციელოს ტყის დაცვის ღონისძიებები, მათ შორის, თანამედროვე ტექნოლოგიების გამოყენებით, რაც შემდგომში, დადგენილი წესით, ასევე აისახება სამონადირეო მეურნეობის მართვის გეგმაში;

ვ) დაიცვას ლიცენზიის გაცემის შემდეგ სამონადირეო მეურნეობის მარეგულირებელ შესაბამის კანონმდებლობაში განხორციელებული ცვლილებების მოთხოვნები და, მათ შესაბამისად, ცვლილებიდან არაუგვიანეს 12 თვისა (თუ კანონმდებლობით სხვა ვადა არ არის დადგენილი) სამინისტროში დასამტკიცებლად წარადგინოს სამონადირეო მეურნეობის მართვის გეგმის განახლებული პროექტი;

ზ) განახორციელოს სამონადირეო მეურნეობის მართვის გეგმით გათვალისწინებული, შესაბამისი კვლევის შედეგად იდენტიფიცირებული სახეობების საშენის მოწყობა, ცხოველთა სახეობების ბუნებაში აღდგენის მიზნით;

თ) სალიცენზიო ტერიტორიის ფიზიკური დაცვის, ასევე ლიცენზირებულ ფართობზე არსებულ ცხოველთა სამყაროს ობიექტების აღრიცხვის მიზნით, მათი გადაადგილების აქტიურ ზონებში განათავსოს ფოტოხაფანგები, სამონადირეო მეურნეობის მართვის გეგმის შესაბამისად;

ი) ხანძარსაწინააღმდეგო წესების დაცვის მიზნით, შეიძინოს და სალიცენზიო ფართობში იქონიოს შესაბამისი ინვენტარი (შენობისა და ტყის ხანძრების თავიდან ასაცილებლად/სალიკვიდაციოდ);

კ) სამონადირეო მეურნეობის სპეციალური ლიცენზიით სარგებლობისას ხელი არ შეუშალოს ტყის მართვის ორგანოს მიერ ადგილობრივი მოსახლეობის ზამთრის სეზონისთვის სათბობი შეშის გაცემის მიზნით გათვალისწინებულ საქმიანობას, სამონადირეო მეურნეობის სპეციალური ლიცენზიის ფარგლებში არსებული/გაცემული ან მომავალში გასაცემი, სარგებლობის ლიცენზიების, სასარგებლო წიაღისეულის მოპოვებისა და კანონმდებლობით გათვალისწინებული რესურსებით სარგებლობის სხვა

ლიცენზიების მფლობელების კანონმდებლობით გათვალისწინებული საქმიანობის განხორციელებას, მათ შორის, სამთო და შესაბამისი მიწის მინაკუთვნის გამოყენებაში, ასევე ამ ლიცენზიით განსაზღვრული ტერიტორიის ფარგლებში სასარგებლო წიაღისეულის საბადოებსა და გამოვლინებებზე შესაბამისი ლიცენზიების გაცემას, ენერგეტიკული ობიექტების ფუნქციონირებას/განვითარებას, ახალი ენერგეტიკული პროექტების განხორციელებასა და ობიექტების მშენებლობას, სხვა სახელმწიფოებრივი და საზოგადოებრივი მნიშვნელობის ინფრასტრუქტურული პროექტების განხორციელებასა და ფუნქციონირებას, დაცული ტერიტორიების შექმნას; ამასთან, აღნიშნულ ლიცენზიებთან დაკავშირებით გაითვალისწინოს საქართველოს კანონმდებლობის შესაბამისი მოთხოვნები, კერძოდ, სამონადირეო მეურნეობის სპეციალური ლიცენზიის ფარგლებში სასარგებლო წიაღისეულის საბადოებსა და გამოვლინებებზე სასარგებლო წიაღისეულის მოპოვების ლიცენზიის გაცემის, აგრეთვე ლიცენზიით განსაზღვრულ ფართობზე სახელმწიფო რეესტრის მიერ დადასტურებული ფართობების გადაფარვის შემთხვევაში, შესაბამისი სამონადირეო მეურნეობის სპეციალური ლიცენზიის ფართობი შესაძლებელია, შემცირდეს შესაბამისი გამოვლინების/საბადოს, კანონმდებლობით გათვალისწინებული რესურსებით სარგებლობის სხვა ლიცენზიის, ასევე სსიპ – საჯარო რეესტრის ეროვნული სააგენტოს მიერ რეგისტრირებული ფართობის ოდენობის ფარგლებში;

ლ) სალიცენზიო ფართობის გარე პერიმეტრზე განათავსოს სასაზღვრო ფირნიშები და სამონადირეო მეურნეობის სქემატური რუკა, ხოლო შიდა სამეურნეო ტერიტორიული ერთეულის ფირნიშებზე დატანილ იქნეს შესაბამისი ერთეულის კონტურები, სამონადირეო მეურნეობის მართვის გეგმით დადგენილი წესით;

მ) განახორციელოს სამონადირეო მეურნეობის სავარგულებში მოპოვებული სანადირო რესურსის ვეტერინარული შემოწმება, მოქმედი

კანონმდებლობით დადგენილი წესით, რაც ასევე უნდა აისახოს სამონადირეო მეურნეობის მართვის გეგმაში;

ნ) განახორციელოს სამონადირეო მეურნეობაში მოპოვებული რესურსის აღრიცხვა – ცხოველების სახეობის, წონის მიხედვით, მოპოვების თარიღის, ადგილისა და დღის მონაკვეთის მითითებით, ასევე შესაძლებლობის შემთხვევაში – სქესისა და ასაკის მიხედვით;

ო) სამონადირეო მეურნეობის სპეციალური ლიცენზიის მოქმედების პერიოდში უზრუნველყოს, რომ სამონადირეო მეურნეობაში დასაქმებული პერსონალის 80% წარმოადგენდეს იმ მუნიციპალიტეტების ადგილობრივ მოსახლეობას, რომლებსაც მოიცავს ლიცენზია;

პ) სამოყვარულო და სპორტული ნადირობის, შემეცნებითი, რეკრეაციული, სათავგადასავლო და ეკოტურიზმის განვითარების მიზნით, სამონადირეო მეურნეობის ტერიტორიაზე განათავსოს შესაბამისი ტურისტული ინფრასტრუქტურა, სამონადირეო მეურნეობის მართვის გეგმით განსაზღვრული მახასიათებლებისა და განთავსების ვადების შესაბამისად;

ჟ) სამონადირეო მეურნეობის ლიცენზიით განსაზღვრულ ტერიტორიაზე ხელი არ შეუშალოს თევზჭერასა და დადგენილი მოსაკრებლის გადახდის შემდეგ კანონით დაშვებულ გადამფრენ სახეობებზე ნადირობას და, ამ მიზნით, გამოყოს საზოგადოებრივი სავარგულები, სადაც ადგილობრივი მოსახლეობა შეძლებს გადამფრენ ფრინველებზე ამ ქვეკუნქტით განსაზღვრულ სეზონურ ნადირობას;

რ) სამონადირეო მეურნეობის მართვის გეგმაში, ტერიტორიის ზონირებისას, არ მოაწყოს სანადირო უბანი და არ დაუშვას ნადირობა კოლხეთის ეროვნული პარკის გარშემო 250-მეტრიან ზონაში;

ს) სამონადირეო მეურნეობის მოწყობისთვის/ფუნქციონირებისთვის უზრუნველყოს არანაკლებ 200 000 (ორასი ათასი) ლარის ინვესტიციის განხორციელება, სამონადირეო მეურნეობის მართვის გეგმაში გაწერილი გეგმა-გრაფიკის შესაბამისად. ამ ვალდებულებების შესრულება

დადასტურებული უნდა იყოს დამოუკიდებელი აუდიტორის მიერ გაცემული დასკვნით, რომელიც ლიცენზიის მფლობელმა უნდა წარადგინოს სსიპ – გარემოს ეროვნულ სააგენტოში არაუგვიანეს ინვესტიციისათვის განსაზღვრული ვადის გასვლიდან 6 თვეში.

პრემიერ-მინისტრი



ირაკლი კობახიძე